

20/08/1999

Azhar menjelajah seluruh negara

MUAR, Khamis - Pelayar Jalur Gemilang, Datuk Azhar Mansor, akan menjelajah seluruh negara mulai bulan depan, bagi mengadakan program motivasi kepada belia.

Menteri Belia dan Sukan, Tan Sri Muhyiddin Mohd Yassin, berkata Azhar adalah contoh belia negara ini yang mempunyai semangat juang tinggi, sedia berkorban dan keberanian yang tiada tolok bandingnya.

Beliau berkata, pihaknya berharap kerajaan negeri sedia bekerjasama bagi menjadi tuan rumah setiap program pertemuan terbabit.

"Beliau adalah wira anak muda yang boleh dibanggakan. Sebagai membalas jasa pimpinan negara, kerajaan, penaja dan sokongan rakyat, beliau bersetuju mengadakan program ceramah motivasi dan pengenalan.

"Kita akan melawat seluruh negara dan mengadakan perhimpunan bagi membolehkan anak muda dan peminat sukan layar berkongsi pengalaman dengannya," katanya.

Muhyiddin berkata, kejayaan Azhar mengharumkan nama negara adalah pencapaian yang sungguh membanggakan dan usahanya itu mendapat perhatian terus Perdana Menteri, Datuk Seri Dr Mahathir Mohamad.

Dalam perkembangan berasingan, beliau berkata prestasi setiap atlit negara yang menyertai Sukan Sea di Brunei minggu lalu, akan dinilai oleh Majlis Sukan Negara (MSN).

Katanya, usaha itu dilakukan bagi mengenal pasti kelemahan dan kelebihan negara dalam usaha membuat persediaan untuk menghadapi Sukan Sea 2001 di Kuala Lumpur.

(END)